

七十二家集

鮑參軍集卷之三

宋東海鮑照明遠著

明閩漳張爕紹和纂

詩

侍宴覆舟山二首

勅爲柳元景作
○以下五言

息雨清上郊開雲照中縣遊軒越丹居暉燭集
涼殿凌高躋飛楹追焱起流宴松苑含靈羣崑
庭藏物變明輝爍神都麗氣冠華甸目遠幽情
周醴洽深恩遍

繁霜飛玉闥愛景麗皇州清蹕戒馳路羽蓋佇
宣游神居旣崇盛崑嶠嶮信環周禮俗陶德聲昌
會濫民謳慙無勝化質謬從雲雨遊

從拜陵登京峴

孟冬十月交殺盛陰欲終風烈無勁草寒甚有
凋松軍井冰晝結士馬羶夜重晨登峴山首霜
雪凝未通息鞍循隴上支劍望雲峰表裏觀地
險升降究天容東嶽覆如礪瀛海安足窮傷哉
良永矣馳光不再中衰賤謝遠願疲老還舊邦

深德竟何報徒令田陌空

蒜山被始興王命作

暮冬霜朔嚴地閉泉不流玄武藏木陰丹鳥還
養羞勞農澤旣周役車時亦休高薄符好蒨藻
駕及時遊鹿苑豈淹盼兔園不足留升嶠眺日
輒臨迴望滄洲雲生玉堂裏風靡銀臺隙陂石
類星懸巖木似煙浮形勝信天府珍寶麗皇州
白日迴清景芳豔洽歡柔參差出寒吹飈戾江
上謳王德愛文雅飛瀚灑鳴球美哉物會昌表

道服光猷

登廬山

懸裝亂水區薄旅次山楹千巖盛阻積萬壑勢
迴縈龍從高昔貌紛亂襲前名洞淵窺地脉聳
樹隱天經松磴上迷密雲竇下縱橫陰冰竇夏
結炎樹信冬榮嘈囀晨鷗思叫嘯夜猿清深崖
伏化迹寄岫閼長靈乘此樂山性重以遠遊情
方躋羽人途永與煙霧并

登廬山望石門

訪世失隱淪從山異靈士明發振雲冠升嶠遠
棲趾高岑隔半天長崖斷千里氛霧承星辰潭
壑洞江汜嶄絕類虎牙嶙峋象熊耳埋冰或百
年韜樹必千祀雞鳴清澗中猿嘯白雲裡瑤波
逐穴開霞石觸峰起迴互非一形參差悉相似
傾聽鳳管賓緬望釣龍子松桂盈膝前如何穢
城市

從登香爐峰

辭宗盛荆夢登歌美鳧繹徒收杞梓饒會非羽

人宅羅景藹雲扃沾光扈龍策御風親列涂乘
山窮禹跡含嘯對霧岑延蘿倚峰壁青冥搖煙
樹穹跨負天石霜崖滅土膏金澗測泉脉旋淵
抱星漢乳竇通海碧谷館駕鴻人巖棲咀丹客
殊物藏珍怪奇心隱仙籍高世伏音華綿古遁
精魄蕭瑟生哀聽參差遠驚覲慙無獻賦才洗
汗奉毫帛

從庾中郎遊園山石室

荒塗趣山楹雲崖隱靈室岡澗紛縈抱林障沓

重密昏昏磴路深活活梁水夾幽閭
乘晝爛地牖窺朝日怪石似龍章
瑕壁麗錦質洞庭安可窮漏井終
不溢沈空絕景聲崩危坐驚慄神
化豈有方妙象竟無迹至哉鍊玉
人處此長自畢

登翻車峴

高山絕雲霓深谷斷無光晝夜淪
霧雨冬夏結寒霜淖坂旣馬領磧
蹕又羊腸畏塗疑旅人忌轍覆行
箱升岑望原陸四眺極川梁遊子
思故居離客遲新鄉新知有客慰
追故遊子傷

登黃鶴磯

木落江渡寒鴈還風送秋臨流斷商絃瞰川悲
棹謳適郢無東轅還藝文作過夏有西浮三崖隱丹
磴九派引滄流淚行感湘別弄珠懷漢遊豈伊
藥餌泰得奪旅人憂

登雲陽九里埭

宿心不復歸流年抱衰疾旣成雲雨人悲緒終
不一徒憶江南聲空錄齊后瑟方絕縈絃思豈
見繞梁日

自礪山東望震澤

湖漫潭洞波合脊嶸嶂雲漲島遠不測岡澗近
難分幽篁愁暮見思鳥傷夕聞以此藉沈痾棲
迹別人群結言非盡書有念豈敷文

三日遊南苑

採蘋及華月追節逐芳雲騰精溢林疏麗日暉
山文清潭圓翠會花薄緣綺紋合樽遽景斜折
榮叅組芬

贈故人馬子喬六首

躑躑城上羊攀隅食玄草俱共日月輝昏明獨
何早夕風飄野籜飛塵被長道親愛難重陳懷
憂坐空老

寒灰滅更然夕華晨更鮮春冰雖暫解冬水復
還堅佳人拾我去賞愛長絕緣歡至不留日感
物輒傷年

松生隴坂上百尺下無枝東南望河尾西北隱
崑崖野風振山籟朋鳥夜驚離悲涼貫年節葱
翠恒若斯安得草木心不怨寒暑移

種橘南池上種杏北池中池北旣少露池南又多風早寒逼晚歲衰恨滿秋容湘濱有靈鳥其字曰鳴鴻一挹繒繳痛長別遠無雙

皎如川上鵠赫似握中丹宿心誰不欺明白古所難憑楹觀皓露灑酒盞憂顏未念平生意窮光不忍還淹留徒攀桂延佇空結蘭

雙劍將離別先在匣中鳴煙雨交將夕從此遂

分形雌沈吳江裏

玉臺作水

雄飛入楚城吳江深無

底楚關有崇扃一爲天地別豈直限幽明神物

終不隔千祀儻還并

荅客

幽居屬有念含意未連詞會客從外來問君何
所思澄神自惆悵嘿慮久迴疑謂賓少安席方
爲子陳之我以韋門士負學謝前基愛賞好徧
越放縱少矜持專求遂性樂不計緝名期歡至
獨斟酒憂來輒賦詩聲交稍希歇此意更堅滋
浮生急馳電物道險絃絲深憂寡情謬進伏兩
睽時願賜十身要得免後賢嗤

和王丞

限生歸有窮長意

一作憶

無已年秋心日迴絕春

思坐連綿銜協曠古願斟酌高代賢迹迹俱浮
海採藥共還山夜聽橫石波朝望宿巖煙明澗
子泝越飛蘿予縈牽性好必齊遂迹幽非妄傳
滅志身世表藏名琴酒間

日落望江贈荀丞

旅人乏愉樂薄暮增思深日落嶺雲歸延頸望
江陰亂流瀝大壑長霧匝高林林際無窮極雲

邊不可尋惟見獨飛鳥千里一揚音惟其感物
情則知遊子心君居帝京內高會日揮金豈念
慕羣客客嗟戀景沈

秋日示休上人

枯桑葉易零疲客心易驚今茲亦何早已聞絡
緯鳴迴風滅且起卷蓬急復征愴愴簞上寒悽
悽帳裏清物色延暮思霜露逼朝榮臨堂觀秋
草東西望楚城百物方蕭瑟坐歎從此生

答休上人

酒出野田稻菊生高岡草味貌復何奇能令君
傾倒玉腕徒自羞爲君慨此秋金蓋覆牙枰何
爲心獨愁

贈鮑侍郎

釋惠休

歲枝兮金英綠葉兮紫莖不入君玉杯低彩
還有榮想君不相艷酒上視塵生當令芳意
重無使盛年傾

吳興黃浦亭庾中郎別

風起洲渚寒雲上日無輝連山耿煙霧長波迴

難依旅鴈方南過浮客未西歸已經江海別復
與親眷違奔景易有窮離袖安可揮慳觴爲悲
酌歌服成泣衣溫念終不渝藻志遠存追役人
多牽滯顧路慙奮飛昧心附遠翰炯言藏佩韋

與伍侍郎別

民生如野鹿知愛不知命飲斲具攢聚翹陸歛
驚遑傷我慕類心感爾食苹性漫漫鄢郢途渺
渺淮海逕子無金石質吾有犬馬病憂樂安可
言離會孰能定欽哉慎所宜砥德乃爲盛貧游

不可忘久交念敦敬

送別王宣城

發郢流楚思涉淇興衛情旣逢青春獻復值白
蘋生廣望周千里江郊藹微明舉爵自惆悵歌
管爲誰清賴陰騰前藻淮陽流昔聲樹道慕高
華屬路佇深馨

送從弟道秀別

參差生密念躑躅行思悲悲思戀光景密念盈

一作
爾

歲時歲時多阻折光景乏安怡以此苦風

情日夜驚懸旗登山臨朝日楊袂別所思浸淫
旦潮廣瀾漫宿雲滋天陰懼先發路遠常早辭
篇詩後相憶杯酒今無持游子苦行役冀會非
遠期

贈傅都曹別

輕鴻戲江潭孤鴈集洲汜邂逅兩相親緣念共
無已風雨好東西一隔頓萬里追憶廼宿時聲
容滿心耳落日川渚寒愁雲繞天起短翮不能
翔徘徊煙霧裏

和傅大農與僚故別

絕節無緩響傷鴈有哀音非同年歲意誰共一作
異別離心伊昔謬通塗冠屣預人林浮江望南
嶽登潮窺海陰孰謂游居淺慕美久相深萋萋
春草秀嚶嚶喜候禽辰物盡明茂尊盛獨幽沈
之子安所適我方栖舊岑墜歡豈更接明愛邈
難尋

送盛侍郎餞候亭

霜霜襲冠帶驅駕越城闔北臨出塞道南望入

鄉津高塘宿寒霧平野起秋塵君爲坐堂子我
乃負羈人欣悲豈等志甘苦誠異身結涕園中
草憔悴悲此春

與荀中書別

勞舟厭長浪疲旆倦行風連翩感孤志契濶傷
賤躬親交薦離愛眷戀置酒終敷文勉征念發
藻慰愁容思君吟涉洧撫已謠渡江慙無黃鶴
翅安得久相從願遂宿知意不使舊山空

從過舊宮

肅裝屬雲旅奉勅承末塗嚴恭履桑梓加敬覽
扮榆靈命蘊川瀆帝寶伏篇圖虎變由石紐龍
翔白鼎湖功冠生民始道妙神器初宮陞畱前
制歌思溢今衢餘祥見雲物遺像存陶漁泉流
信清泌原野實甘荼豈伊愛鄴鄙天險兼上腴
東秦邦北門非親誰克居仁聲日月懋惠澤雲
雨敷盧令美何歇唐風久不渝微臣逢世慶征
賦備人徒空費行葦德採束謝生芻

從臨海王上荆初發新渚

客行有苦樂但問客何行
板龍不待翼附驥絕
塵冥梁珪分楚牧羽鷁指全荆
雲艫掩江汜千里被連旌
戾戾旦風迢嘈嘈晨鼓鳴
收纜辭帝郊揚棹發皇京
狐兔懷霜志犬馬戀主情
撫襟同太息相顧俱涕零
奉役塗未啓思歸思已盈

還都道中三首

悅懌遂還心踴躍貪至勤
鳴雞戒征路暮息落日分
急流騰飛沫回風起江濱
孤獸啼夜侶離鴻噪霜群
物哀心交橫聲切思紛紜
歎慨訴同

旅美人無相聞

風急訊灣浦裝高偃檣舳夕聽江上波遠極千
里目寒律驚窮蹊爽氣起喬木隱隱日沒岫瑟
瑟風發谷鳥還暮林誼潮上冰結沍夜分霜下
淒悲端出遙陸愁來攢人懷羈心苦獨宿

久宦迷遠川川廣每多懼薄止閭邊亭關歷險

程路靈巖冥隅岫濛昧江上霧時涼籟爭吹流

洄浪奔趣

一作注

惻焉增愁起搔首東南顧茫然

荒野中舉目皆凜素回風楊江泌寒棲動樹

太息終晨漏企我歸颺遇

上潯陽還都道中

昨夜宿南陵今旦入蘆洲客行惜日月崩波不
可留侵星赴早路畢景逐前儔鱗鱗夕雲起獵
獵晚一作曉風適騰沙鬱黃霧翻浪揚白鷗登艫
眺淮甸掩泣望荆流絕日盡平原時見遠煙浮
倏忽坐還合俄思甚兼秋未嘗違戶庭安能干
里遊誰令乏古節貽此越鄉憂

還都至三山望石頭城

泉源安有流川末澄遠波晨光被水渌曉氣歇
林阿兩江皎平迴三山鬱駢羅南帆望越嶠北
榜指齊河關扁繞天邑襟帶抱尊華長城非壑
嶮峻咀似荆芽攢樓貫白日摘堞隱丹霞征夫
喜觀國遊子遲見家流連入京引躑躅望鄉歌
謂何

還都口號

分壤蕃帝華列正謁皇宮禮讌及年暇朝奏因

歲通維舟歇金景結棹俟昌風鉦歌首寒物歸
吹踐開冬陰沈煙塞合蕭瑟涼海空馳霜急歸
節幽雲慘天容旌鼓貫玄塗羽鶴被長江君王
遲京國遊子思鄉邦恩世共渝洽身願兩板逢
勉哉河濟客勤爾尺波功

行京口至竹里

高柯危且竦鋒石橫復仄複澗隱松聲重崖伏
雲色冰閉寒方壯風動鳥傾翼斯志逢凋嚴孤
遊值飄逼乘塗無憇鞍半菽不遑食君子樹令

名細人効命力不見長河水清濁俱不息

發後渚

江上氣早寒仲秋始霜雪從軍乏衣糧方冬與
家別蕭條背鄉心悽愴清渚發涼埃晦平臯飛
潮隱脩樾孤光獨徘徊空煙視昇滅塗隨前峰
遠意逐後雲結華志分馳年韶顏慘驚節推琴
三起歎聲爲君斷絕

岐陽守風

差池玉繩高掩藹瑤井沒廣岸屯宿陰懸崖棲

歸月役人喜先馳軍令申早發洲迴風正悲江
寒霧未歇飛雲日東西別鶴方楚越塵衣孰揮
澣蓬思亂光髮

發長松遇雪

土牛旣送寒冥陸方決馳振風搖地局封雪滿
空枝江渠合爲陸天野浩無涯飲泉凍馬骨斷
冰傷役疲昆明豈不慘黍谷寧可吹

詠史

五都矜財雄三川養聲利百金不市死明經有

高位京城十二衢飛甍各騰式任子影華纓游
客竦輕轡明星晨未曉軒蓋已雲至賓御紛颯
沓鞍馬光照地寒暑在一時繁華及春媚君平
獨寂寞身世兩相棄

蜀四賢詠

司馬相如
王褒

嚴君平
楊雄

渤海水浴鳧春山玉抵鵲皇漢方盛明群龍滿
階閣君平因世閒得還守寂寞閉簾注道德開
卦述天爵相如達生肯能屯復能躍陵令無人
事毫墨時灑落褒氣有逸倫雅績信炳博如今

聖納賢金璫易羈絡良遮神明遊豈伊覃思作
玄經不期賞蟲篆憂散樂首路或參差投駕均
遠託身表旣非我生內任豐薄

擬古八首

魯客事楚王懷金襲丹素旣荷主人恩又蒙令
尹顧日宴罷朝歸鞍馬塞衢路宗黨生光輝賓
僕遠傾慕富貴人所欲道得亦何懼南國有儒
生迷方獨淪誤伐木清江湄設置守鳬兔

十五諷詩書篇翰靡不通弱冠叅多士飛步游

秦宮側覩君子論預見古人風兩說窮舌端五
車摧筆鋒羞當白璧貺耻受聊城功晚節從世
務乘障遠和我解佩襲犀渠卷袞奉盧弓始願
力不及安知今所終

幽并重騎射少年好馳逐羶帶佩雙鞬象弧插
雕服獸肥春草短飛鞚越平陸朝遊鴈門上暮
還樓煩宿石梁有餘勁驚雀無全目漢虜方未
和邊城屢翻覆畱我一白羽將以分虎竹

鑿井北陵隈百丈不及泉生事本瀾漫何用獨

精堅幼壯重寸陰
衰暮及輕年放駕
息朝歌提爵止中
山日夕登城隅周
迴視洛川街衢積
凍草城郭宿寒煙
繁華悉何在宮闕
久崩填空謗齊景
非徒稱夷叔賢

伊昔不治業倦遊
觀五都海岱饒壯
士蒙泗多宿儒結
髮起躍馬垂白對
講書呼我升上席
陳鰾發瓢壺管仲
死已久墓在西北
隅後面崔嵬者桓
公舊塚廬君來誠
旣晚不覩崇明初
玉琬徒見傳交友
義漸疎

東籬幽篁裏刈黍寒澗陰朔風傷我肌號鳥驚
思心歲暮非賦訖程課相追尋出租送函谷歎
蒙輸上林河渭冰未開關隴雪正深笞擊官有
罰呵辱吏見侵不謂乘軒意伏櫪還至今

河畔草未黃胡鴈已矯翼秋螢扶戶吟寒婦成
夜織去歲征人還流傳舊相識聞君上隴時東
望久歎息宿昔改衣帶朝旦

玉臺作
旦暮

異容色念

此憂如何夜長愁更多明鏡塵匣中瑤琴生網

羅

蜀漢多奇山仰望與雲平陰崖積戾雪陽谷散
秋榮朝朝見雲歸夜夜聞猿鳴憂人本自悲孤
客易傷情臨堂設樽酒留酌思平生石以堅爲
性君勿輕素誠

鮑參軍集卷之四

宋東海鮑照明遠著

明閩漳張燮紹和纂

詩

紹古辭七首

橘生湘水側
非陋人莫傳
逢君金華宴
得在玉几前
三川窮名利
京洛富妖妍
恩榮難久恃
隆寵易衰偏
觀席妾悽愴
覩翰君泫然
徒抱忠孝志
猶爲葑菲遷

此首藝文作張華外
編作漢古辭皆非

昔與君別時蠶妾初獻絲何言年月駛寒衣也
擣治縑繡多廢亂篇帛久塵縑離心壯爲劇飛
念如懸旗石席我不爽德音君勿欺

瑟瑟涼海風竦竦寒山莽紛紛羈思盈慊慊夜
絃促訪言山海路千里歌別鶴絃絕空咨嗟形
音誰賞錄辛苦異人狀美貌改如玉徒畜巧言
鳥不解心欸曲

孤鴻散江嶼連翩遶渚飛含嘶衡桂浦馳顧河
朔畿攢攢勁秋木昭昭淨冬暉牕前滌歡爵帳

經舞衣芳歲猶自可日夜望君歸

溫既夜月迴眺出谷雲還山路已遠往海不
及群徘徊清淮汭顧慕廣江濱物情乖喜歎守
操古難聞三越豐少姿容態傾動君

開黛觀容

一作朝

顏臨鏡訪遙塗君子事河源彌

祀闕還書春風掃地起飛塵生綺疏文桂爲誰
設羅帳空卷舒不怨身孤寂但念星隱隅

暖歲節物早萬萌迎春達春風夜嫵媚春霧朝
暍霽軟蘭葉可采柔桑條易將怨咽對風景閑

簪守閨闥天賦愁民命含生但契闊憂來無行
伍歷亂如覃葛

學古

北風十二月雪下如亂巾實是愁苦節惆悵憶
別一作情親會得兩少妾同是洛陽人嬛緜好睂

目閑麗美腰身凝膚皎若雪明淨色如神驕愛
生眇眇聲嬌起朱唇衿服襍緹纈首飾亂瓊珍
調絃俱起舞爲我唱梁塵人生貴得意懷願待
君申幸值嚴冬暮幽夜方未晨齊衾久兩設角

枕已雙陳願君早休息
爾歌待三春

古辭

容華不待年何爲客遊梁
九月寒陰合悲風斷
君腸歎息空房婦幽思坐自傷
勞心結遠路惆悵獨未央

擬青青陵上栢

涓涓亂江泉綿綿橫海煙
浮生旅昭世空事歎
華年書翰幸閒暇我酌子縈絃
飛鑣出荆路驚服指秦川
渭濱富皇居鱗館匝河山
輿童唱秉

椒櫂女歌采蓮乎愉鸞閣上窈窕鳳檻前娛生
信非謬安用求多賢

學劉公幹體五首

欲宦乏王事結主遠恩私爲身不爲名散書徒
滿帷連冰上冬月披雪拾園葵聖靈燭區外小
臣良見遺

噫噫寒野霧蒼蒼陰山栢樹迴霧縈集山寒野
風急歲物盡淪傷孤貞爲誰立賴樹自能貞不
計迹幽澀

胡風吹朔雪千里度龍山集君瑤臺上飛舞兩
臨前茲晨自爲美當避艷陽天艷陽桃李節皎
潔不成妍

荷生淥泉中碧葉齊如規迴風蕩流霧珠水逐
條垂彪炳此金塘藻耀君王池不愁世賞絕但

畏盛明移

藝文作
張華

白日正中時天下共明光北園有細草當晝正
含霜垂榮頓如此何用獨芬芳抽琴爲爾歌絃
斷不成章

擬阮公夜中不能寐

漏分不能臥酌酒亂繁憂
惠氣憑夜清素景緣隙流
鳴鶴時一聞千里絕無儔
佇立爲誰久寂寞空自愁

學陶彭澤體

奉和王義興

長憂非生意短願不須多
但使尊酒滿朋舊數相過
秋風七八月清露潤綺羅
提瑟當戶坐歎息望天河
保此無傾動寧復滯風波

數詩

一身仕關西家族滿山夷二年從車駕齋祭甘
泉宮三朝國慶畢休沐還舊邦四牡曜長路輕
蓋若飛鴻五侯相餞送高會集新豐六樂陳廣
坐組帳揚春風七盤起長袖庭下列歌鍾八珍
盈雕俎綺肴紛錯重九族共瞻遲賓友仰徽容
十載學無就善宦一朝通

建除詩

建旗出燉煌西討屬國羌除去徒與騎戰車羅
萬箱滿山又填谷投鞍合營牆平原亘千里旗

鼓轉相望定舍後未休候騎救前裝執戈無暫
頓鸞弧不解張破滅西零國生虜郅支王危亂
悉平蕩萬里置關梁成軍入玉門士女獻壺漿
收功在一時歷世荷餘光開壤襲朱紱左右佩
金章閉帷草太玄茲事殆愚狂

白雲

探靈喜解骨測化善騰天情高不戀俗厭世樂
尋仙鍊金宿明館屑玉止瑤淵鳳歌出林闕龍
駕戾蓬川凌崖采三露攀鴻戲五煙昭昭景臨

霞湯湯風媚泉命娥雙月際要媛兩星間飛虹
曉卷河沘霧弄輕絃笛聲謝廣賓神道不復傳
一逐白雲去千齡猶未旋

臨川王服竟還田里

送舊禮有終事君慙懦薄稅駕罷朝衣歸志願
巢壑尋思邈無報退命愧天爵拾耨將十齡還
得守場藿道經盈竹筥農書滿塵閣愴愴秋風
生戚戚寒緯作豐霧粲草華高月麗雲嶢屏跡
勤躬稼衰疾倚芝藥顧此謝人群豈直止商洛

行樂至城東橋

雞鳴關吏起伐鼓早通晨嚴車臨迴陌延轍歷
城園蔓草綠高岡脩楊夾廣津迅風首旦發平
路塞飛塵擾擾遊宦子營營市井人懷金近從
利撫劍遠辭親爭先萬里塗各事百年身開芳
及稚節含絲客驚春尊賢永照灼孤賤長隱淪
容華坐銷歇端爲誰苦辛

園中秋散

負疾固無豫晨衿悵已單氣交蓬門疎風數園

草殘荒墟半晚色幽庭暝夕寒旣悲月戶清復
切夜蟲酸流枕商聲苦騷殺年志閑臨歌不知
調發興誰與歡儻結絃上情豈孤林下彈

觀圃人藝植

善賈笑黠漁巧宦賤農牧遠養適關市深利窮
海陸乘輶寶金羈當墟信珠服居無逸身伎安
得坐梁肉徒承屬生幸政緩吏平睦春畦及耘
藝秋場早芟築澤閤旣繁高山營又登熟抱鍾
隴上餐結茅野中宿空織已尙淳寧知俗翻覆

遇銅山掘黃精

土肪闔中經水芝韜內策

一作籍

實餌緩童年命

藥駐衰曆矧蓄終古情重拾煙霧迹羊角棲斷
雲榼口流隘石銅谿晝森沈乳竇夜涓滴旣類
風門磴復像天井壁蹢蹢寒葉離濃濃秋水積
松色遶野深月露依草白空守江海思豈懷梁
鄭客得仁古無怨順道今何惜

見賣玉噐者

并序

見賣玉噐者或人欲買疑其是珉不肯成市

聊作此詩以戲買者

涇渭不可襍珉玉當早分子實舊楚客蒙俗謬
前聞安知理乎采豈識質明溫我方歷上國從
洛入函轅揚光十貴室馳譽四豪門奇聲振朝
邑高價服鄉村寧能與爾曹瑜瑕稍辨論

懷遠人

哀樂生有端離會起無因去事難重念恍惚似
如神屬期眇起遠後遇邈無辰馳風掃遙路輕
蘿含夕塵思君成首疾欲息眉不伸

夢歸鄉

玉臺作
夢還詩

銜淚出郭門撫劍無人達沙風暗空

玉臺作寒

起離

心眷鄉畿夜分就孤枕夢想暫言歸孀婦當戶

歎縲絲

外編作
極首

復鳴機慊款論久別相將還綺

闌歷歷簷下涼隴隴帳裏暉刈蘭爭芬芳採菊

競葳蕤開奩奪香蘇襟袖解纓徽夢中長路近

覺後大江遠驚起空歎息恍惚神魂飛白水漫

浩浩高山壯巍巍波濤異往復風霜改榮衰此

土非吾土慷慨當告誰

春羈

征人歎道遐去鄉
獨路迢佳期每無從
淮陽非尺咫
春日起游心勞情出徙倚
岫遠雲煙綿谷
石泉靡迤風起花四散
露濃條暄妍正在
茲摧抑多嗟思嘶聲名一作石邊堅豈我箱中紙
染翰餉君琴新聲憶解子

歲暮悲

霜露迭濡潤草木互榮落
日夜改運周今悲復如昨
晝色苦沈陰白雪夜迴薄
皦潔冒霜鴈飄

揚出風鶴天寒多顏苦妍容逐丹壑絲眉千里
心獨宿之然諾歲暮美人還寒壺與誰酌

在江陵歎年傷老

五難未易夷三命戒淵抱方瞳起松髓頰髮疑
桂腦役生良自休大患安足保開簾窺景夕備
屬雲物好翩翩燕弄風嫋嫋柳垂道池瀆亂蘋
萍園援美花草節如驚灰異零落就衰老

夜聽妓二首

夜來坐幾時銀漢傾露落澄滄入閨景歲蕤被

園囀絲管感暮情哀音遶梁作芳塵不可恒及
歲共爲樂天明坐當散琴酒駛絃酌
蘭膏消耗夜轉多亂筵襍坐更絃歌傾情逐節
寧不苦特爲盛年惜容華

翫月城西門廨中

始出西南樓纖纖如玉鉤未映東北墀娟娟似
娥眉娥眉蔽珠櫳玉鉤隔鎖牕三五二八時千
里與君同夜移衡漢落徘徊帷戶

玉臺作幌中歸華

先委露別葉早辭風客遊厭苦辛仕子倦飄塵

休澣自公日宴慰及私辰蜀琴抽白雪郢曲發
玉臺作繞陽春肴乾酒未闕金壺啓夕淪迴軒駐輕
蓋畱酌待情人

喜雨

奉敕作

營社達羣陰屯雲

藝文作連宮

掄積陽河井起龍蒸

日魄斂游光族雲飛泉室震風沈羽鄉升雰浹
地維傾澗瀉天潢平灑周海嶽曲潦溢川莊驚
雷鳴桂渚迴涓流玉堂珍木抽翠條炎卉擢朱
芳關市欣九賦京廩開萬箱無謝堯爲君何用

知栢皇

苦雨

連陰積澆灌滂沱下霖亂沈雲日夕昏驟雨淫
朝旦蹊澗走獸稀林寒鳥飛晏密霧冥下溪聚
雲屯高岸野雀無所依羣雞聚空館川梁目已
廣懷人邈渺漫徒酌相思酒空急促明彈

詠白雪

白珪誠自白不如雪光妍工隨物動氣能逐勢
方圓無妨玉顏媚不奪素繒鮮投心障苦節隱

迹避榮年蘭焚石旣斷何用恃芳堅

三日

氣暄動思心柳青起春懷時艷憐花藥服淨俛
登臺提觴野中飲愛心煙未閒露色染春草泉
源潔冰苔泥泥濡露條嫋嫋承風栽鳧雛掇苦
薺黃鳥銜櫻梅解衿欣景預臨流競覆杯美人
竟何在浮心空自摧

詠秋

秋蘭徒晚綠流風漸不親飈我垂恩幕驚此梁

上塵沈陰安可久
豐景將途淪何由
忽靈化暫見別離人

秋夕

慮滂擁心用夜默
發思機幽閨淥涼
吹閒庭滿清暉
紫蘭花已歇青梧
葉方稀江上淒海
戾漢曲驚朔霏髮
斑悟壯晚物謝知
歲微臨宵嗟獨對
撫賞怨情違躊躇
空明月惆悵徒深
帷

秋夜二首

夜久膏旣竭格明
旦未央環情倦始
復空閨起

晨裝幸承天光轉曲影入幽堂徘徊集通隙宛
轉燭迴梁帷風自卷舒簾露視成行歲役急窮
晏生慮備溫涼絲紉夙染濯綿綿夜裁張冬雪
旦夕至公子乏衣裳華心愛零落非直惜容光
願君翦衆念且共覆前觴

遁跡避紛喧貨農棲寂寞荒徑馳野鼠空庭聚
山雀旣遠人世歡還賴泉升樂折柳樊場圃負
綆汲潭壑霽旦見雲峰風夜聞海鶴江介早寒
來白露先秋落麻壘方結葉瓜田已掃穽傾暉

念西下迴景思華幕攀蘿席中軒臨觴不能酌
綵古自多恨幽悲共淪鑠

和王護軍秋夕

散漫秋雲遠蕭蕭霜月寒驚飈西北起孤鴈夜
往還開軒當戶牖取琴試一彈停歌不能和終
曲久辛酸金氣方勁殺隆陽微且單泉涸甘井
竭節徙芳歲殘生事各多少誰共知易難投章
心蘊結千里途輕紉願託孤老暇觴思暫開餐

和王義興七夕

宵月向掩扉夜霧方當白寒機思婦婦秋堂泣
征客匹命無單年偶影有雙夕暫交金石心須
更雲雨隔

王僧達七夕月下詩附

遠山歛氣褻廣庭揚月波氣往風集隙秋還
露泫柯節期旣已屏中宵振綺羅來歡詎終
夕收淚泣分河

冬至

舟遷莊甚笑水流孔急歎景移風度改日至晷

廻換眇眇負霜鶴皎皎帶雲雁長河結珊瑚層
冰如玉岸哀哀古老容慘顏愁歲晏催促時節
過逼迫聚離散美人還未央鳴筆誰與彈

冬日

嚴風亂山起白日欲還次
廕霧蔽窮天夕陰晦
寒地煙霾有氛氲精光無明異風急野田空饑
禽稍相集合生共通閉懷賢敦爲利天窺苟平
圓寧得已偏媚瀉海有歸潮衰容不還穉君今
且安歌無念老方至

望水

刷鬢垂秋日登高觀水長千澗無別源萬壑共
一廣流駛巨石轉湍迴急沫上茗茗嶺岸高照
照寒洲爽東歸難忖惻日逝誰與賞臨川憶古
事目孱千載想河伯自矜大海若沈渺莽

望孤石

江南多暖谷雜樹茂寒峯朱華抱白雪陽條熙
朔風蚌節流綺藻輝石亂煙虹泄雲去無極馳
波往不窮嘯歌清漏非徘徊朝景終浮生會當

幾歡酌每盈衷

山行見孤桐

桐生藜石裏根孤地寒陰上倚崩岸勢下帶洞
阿溪奔泉冬激射霧雨夏霖淫未霜葉已肅不
風條自吟昏明積苦思晝夜抖哀禽棄妾望掩
淚逐臣對撫心雖以慰單危悲涼不可任幸願
見雕斲爲君堂上琴

詠雙燕二首

雙燕戲雲崖羽翰始差池出入南閨裏經過此

堂陞意欲巢君幕層楹不可窺沈吟芳歲晚徘徊韶景移悲歌辭舊愛銜淚覓新知

可憐雲中燕旦去暮來歸自知羽翅弱不與鵠爭飛寄聲謝飛鵠往事子毛衣瑣心誠貧薄匡公節榮衰陰山饒苦霧危節多勁威豈但避霜雪當儆野人機

酒後

晨節無兩淹年意不俱處自非羽酌歡何用慰愁旅

言易

雲澤翔羽姬橫蓋招益人貢園無金尚履道易
書紳

可愛

風帷閃珠帶月幌垂霧羅魏粲縫秋裳趙豔習
春歌

夜聽聲

辭鄉不覺遠歡寡憂自繁何用慰秋望清燭視
夜翻

咏老

軟顏收紅藥玄鬢生素華
冉冉逝將老咄咄奈老何

春咏

節運同可悲莫若春光甚
和風未及燠遺涼清且凜

字謎三首

二形一體四支八頭四八一八飛泉仰流

非字

頭如刀尾如鉤中央橫廣四角六抽右面負兩

亦左邊雙屬牛

龜字

乾之一九隻立無偶坤之二六宛然雙宿

士字

贈顧墨曹

昏明易遠離會難揆雲轍泉分西艫東軌

聯句

在荊州與張使君李居士聯句

橋磴支吾轍篁路拂輕鞍三尹無喜色一適或
垂竿

與謝尚書莊三連句

霞輝兮澗朗日靜兮川澄風輕桃欲開露重蘭
未勝水光溢兮松霧動山煙疊兮石露凝掩映
晨物綵連綿夕羽興

月下登樓連句

髣髴羅月光
繽紛篁霧陰
樂來亂夢念
酒至歡

憂心

鮑博士

露入覺牖高
螢蜚測苑
溪清氣澄永

夜流吹不可臨

王延秀

密峯集浮碧
疎澗道瀛尋

嗽玉延幽性
攀桂藉知音

荀原之

辰意事淪勝良

歡戒勿祲昭景有遺
駟疏賈無留金

荀中書萬秋

鮑參軍集卷之五

宋東海鮑照明著

明閩漳張爕紹和輯

表疏

爲柳令讓驃騎表

臣言伏承詔書加臣驃騎將軍餘如故顧循空
薄屢隆成命仰當天寵伏抱慙灼臣素陋人本
絕分望適野謝山川之志輟耕無鴻鵠之歎宦
希鄉部富期農牧夙當昌朝早值恩洽天網紛

橫皇曆歸聖佐輪不殷良馬未汗功半下列爵
超上賞奮迹騰光參駕龍服翰起雲飛拂翼虹
路雖曩之脫駕拖紫弛擔丹轂方之微臣彼安
足齒齊此而歸懼塵王度況遂頻煩重彰濫越
伏願天德曲成資始令終雨露之惠自華及殞
特屈慈獎降申愚固則綢繆之施復踰造物不
勝感躍惶駭之情謹拜表以聞

謝秣陵令表

臣照言卽日被尙書召以臣爲秣陵令臣負錡
下農執羈末皂情有局塗志無遠立遭命逢天
得汙官牒不悟恩澤無窮謬當獎試用謝刀筆
猥承宰職豈是闇懦所能克任今便抵召違離
省闈係戀罔極不勝下情謹拜表以聞

解褐謝侍郎表

臣照言臣孤門賤生操無剋迹鶉棲草澤情不
及官不悟天明廣矚騰滯援沉觀光幽節聞道
朝年榮多身限思非終報

謝解禁止表

臣言被宣令解臣禁止天光鄭重不可勝逢
聖知感矧臣人類臣聞獲過于神或憑尸視以
請得罪於君可因左右而謝臣自惟孤賤盜幸
榮經閣濫大誼猖狂世禮奇非阮籍無保持之
助才愧馮衍有韃轅之困自非聖朝超然覽臣
於視聽之外則今日渥澤更成妄遭來辰萎葉
終先朝草小人歲暮知能何報徒厚恩華憂懼
歎息不任下情謹詣拜表以聞

皇孫誕育上表

兼郎中令侍郎臣照言伏承東儲積慶皇孫誕
育國祚昌期民迎福運臺禁稱祉并廬相賀伏
惟聖懷載深鴻念不任下情謹詣閣上表以聞

征比世子誕育上表

臣等言臣聞本枝無疆布諸前典衆多彌貴信
之華封故德積則慶深業昌則祚廣伏承王子
以中氣正月鍾靈納和誕躬紫閣膺祚朱紱弧
矢夙陳珪璋攸覲雲光麗輝巖澤昭采嘉祥爰
孚柔顏載晬凡在氓隸莫不忭悅臣霑恩踰物
慶倍自中不勝殊歡溢喜謹奉表以聞

拜侍郎上疏

臣言臣北州衰淪身地孤賤衆善必違百行無
一生丁昌運自比人曹操乏端槩業謝成迹徂
年空往瓊心靡述祝轡投簪於斯終志東萊負
新期與相畢安此定命忝彼公朝不悟乾羅廣
收圓明兼覽雕瓠飾筌備雲和之品潢汗流渫
克金鼎之寶鍛羽暴鱗復見翻躍枯楊寒炭遂
起烟華未識微躬猥能及此未知陋生何以爲
報祇奉恩命憂愧增灼不勝感荷屏營之情謹

請閣拜疏以聞

侍郎報蒲辭閣疏

臣言臣所居職限滿今便收迹金闕雲路從茲
自遠鮪鯉沉藏方絕光景祇戀遲迴結涕濡泗
臣器机窮賤情嗜跡昧身弱涓斲地幽井谷奈
應守業墾畛剗芴牧雞圈豕以給征賦而幼性
猖狂因頑慕勇釋擔受書廢耕學文畫虎旣敗
學步無成反拙歸跂還陋鷲雀日晏途遠塊然
自喪加以無良根孤伎薄旣同馮衍貧困之累
復抱相如消渴之疾志逐運離事與衰合束馬

埋輪絕游息世宿福餘慶爰邁聖明煦蒸霜霰
萃甲雲露得從下走叨迹人行操勒負羈班榮
扈隸矜恩訓短哀有弗及奉此而歸足以沒齒
雖摩肌髮無報天德更冀營魂還能結草不勝
感戀之情謹詣闕拜疏奉辭以聞

轉官侍上疏

臣言卽日被中曹板轉臣爲左常侍臣自惟常人觸事無可謬被拔擢實爲光榮臣旣無髣髴上報殊絕之恩有分每豐其過前後輕重輒得原恕獎以君子之方赦其不閑教訓大愆不責矜澤必加是臣所以夙夜自念知遭遇之至深至厚也未冀未望便荷今榮欣喜感悅不敢僞讓庶保終始身命爲初不勝下情謹詣閣拜疏謝以聞

謝隨恩被原疏

臣言卽日被曹宣命元統內外五刑以下浩澤
盪汰臣亦預焉得從漢律故謬之辨闡遭周典
肆眚之科大喜卒至非願所圖魚愕雞睨且悚
且慙臣誠下愚不達義方然君尊臣泰豈同犬
馬且常侍臣淵穆疏草卽臣所作助人爲恭猶
加敬憶自己率禮寧敢慢忘由臣悴賤可侮可
誣曾參殺人臣豈無過寢病幽栖無援朝列身
孤節卑易成論硃幸大明臨下仁道毓物澤洎

翺走臣覃末慶然古人有言楊者易生之木也
一人植之十人拔之無生楊矣何則植之者難
拔之者易况臣一植之功不立衆拔之過屢至
同彼風霜異此貞脆書稱天秩有禮易載神福
在謙臣之謙禮理謝幅秩仰銜俯媿行歎坐戚
卽欲顛沛拜恩下庭但臣病久柴羸不堪冒涉
小得趨馳星駕登路不勝荷佩之誠謹上疏以
聞

啓

論國制啓

臣啓臣聞尺之量錦工者裁之豪丈之木繩墨
在焉事無巨細非法不行當今世問政睦藩國
相望君舉必書動成准式息躬聖壤十有餘載
條制節文宜其備矣諸王列封動靜兼該而竊
見國之處事未盡善臣之暗蔽私心有惜伏見
彭城國舊制猶有數卷雖多殊革大綱可依愚
謂宜令掌固刊而撰之上著朝典藩邦之度下

國朝訓繁簡之誼傍酌州府寬猛之中章程久
具未爲恒制豈伊今美乃足貴之將來臣忝克
直員脫以啓聞煩而非要伏追慙悚謹啓

謝上除啓

臣言被宣賜臣上除臣伏事日淺蒙荷已豐天澤所及且喜且懼但臣自丁常榷來塗階級非所敢冀今日榮願直爾不少冒乞停止上除伏願重許干穢悚息

謝賜藥啓

臣衛躬不謹養命無術情渝五難妙謝九法
麟落先傷衰疴早及遐澤紅臨猥委存卹
癘同山嶽蒙靈藥之賜惠非河間謬仙使
之屈恩逾脯糗惠重帷席荷對銜慙伏抱
衿涇

謝永安令解禁止啓

臣田茅下第質非謝品志終四民希絕三仕邀
世逢辰謬及推擇恩成曲積榮秩兼過雖誓投
織生昊天罔極迄無犬馬孤慙星歲加以淪節
雪飈沉誠欸晦值天光燭幽神照廣察澡疊從
宥與物更稟遂晞曬陽春湔汰秋水綴翼雲條
葺鮮決沼洗膽明目扞手太平重甄再造含氣
孰比不悟乾陶彌運復垂挺飾矯迹升等改觀
非服振纓珥筆聯承貴寵豈臣浮朽所可恭從

實非愚瞢所宜循踐瑣族易灰脆漏已迫空荷
載燾終責仰復飲冰肅事懷火畢命不勝屏營
之情謹啓事以聞



通世子自解啓

僕以常桓無用於世遭逢謬幸被受恩榮誠願
論畢久宜捐落仁眷篤終復獲淹停感今惟昔
銜佩無已但自無堪尸素累載腹心之愧寤寐
爲憂今請解所職願蒙矜許自奉清塵于茲六
祀隆辰永徃遺恩在心執紙哽咽言不自宣

重與世子啓

奉還誨深承殷勤篤眷之重披讀未終悲愧交集僕以常人所蒙隆厚久應知退非適今日銜恩戀德川缺進心今者之請必願鑒許且僕棲遲無事咫尺館第餐稟風微非旦則夕居職還私兩者無異而於僕無用有以自處豈非仁念始終之惠重致于日彌深慙感

請假啓

臣啓臣居家之治上漏下濕暑雨將降有懼崩
壓比欲完葺私寡功力板鋪絢塗必須躬役冒
欲請假三十日伏願天恩賜垂矜許干啓復追
悚息謹啓

又

臣啓臣所患彌留病軀沉痾自近蒙歸頻更頓
處日夜間困或數四委然一弊瞻景待化加以
凶衰嬰遭慘悼終鮮兄弟仲由所哀臣實百罹

孤苦風雨天倫同氣實惟一妹存沒永訣不獲
計見封瘞泉壤臨送私懷感恨情痛兼深臣母
年老經離憂傷服膺食淡羸耗增疾心計焦迫
進退罔躋冒乞申假百日伏願天慈賜垂矜許
臣違福履身事屯悴歎息和景掩淚春風執啓
涕結伏追惶悚謹啓

奉始興王白紵舞曲啓

侍郎臣鮑照啓被教作白紵舞歌辭謹竭庸陋
裁爲四曲附啓上呈識方洪粹思塗猥局言旣
舞雅聲未能文不足以宣贊聖旨抽拔妙實謹
遣簡餘慙隨悚盈謹啓

鮑參軍集卷之六

宋東海鮑照明遠著

明閩漳張燮紹和纂

書

登大雷岸與妹書

吾自發塞雨全行日少加秋潦浩汗山溪猥至
渡沂無邊險徑遊歷棧石星飯結荷水宿旅客
貧辛波路壯闊始以今日食時僅及大雷塗登
千里日踰十晨嚴霜慘節悲風斷肌去親爲客

如何如何向因涉頓憑觀川陸邀神清渚流睨
方曛東顧五洲之隔西眺九派之分窺地門之
絕景望天際之孤雲長圖大念隱心者久矣南
則積山萬狀爭氣負高含霞飲景參差代雄凌
跨長隴前後相屬帶天有匝橫地無窮東則砥
原遠隰亡端靡際寒蓬夕卷古樹雲平旋風四
起思鳥羣歸靜聽無聞極視不見北則波池潛
演湖脈通連葦蒿攸積蓼蘆所繁栖波之鳥水
化之蟲智吞愚彊捕小號噪驚聒紛乎其中西

則廻江永指長波天合滔滔何窮漫漫安竭創
古迄今舳艫相接思盡波濤悲滿潭壑煙歸八
表終爲野塵而是注集長寫不測修靈浩盪知
其何故哉西南望廬山又特驚異基壓江潮峯
與辰漢連接上常積雲霞雕錦繡若華夕曜巖
澤氣通傳明散綵赫似絳天左右青靄表裏紫
霄從嶺而上氣盡金光半山以下純爲黛色信
可以神居帝郊鎮控湘漢者也若深洞所積溪
壑所射鼓怒之所厯擊湧瀆之所宕滌則上窮

荻浦下至猗洲南薄鷺爪北極雷殿削長埤短
可數百里其中騰波觸天高浪灌日吞吐百川
寫泄萬壑輕煙不流華鼎振潏弱草朱靡洪漣
隴颺散渙長驚電透箭疾穿溘崩聚坻飛嶺覆
回沫冠山奔濤空谷礧石爲之摧碎碯斧爲之
螫落仰視大火俯聽波聲愁魄脅息心驚慄矣
至於繁化殊育詭質怪章則有江鷺海鴨魚鮫
水虎之類豚首象鼻芒鬚針尾之族石蟹土蚌
燕箕雀蛤之儔折甲曲牙逆鱗返舌之屬掩沙

漲被草渚浴雨排風吹滂弄翻夕景欲沉曉霧
將合振鶴寒嘯遊鴻遠吟樵蘇一歎舟子再泣
誠足悲憂不可說也風吹雷颺夜戒前路下弦
內外望遠所屆寒暑難適汝專自慎風夜戒護
勿我爲念恐欲知之聊書所覩臨塗草感辭意
不周

頌

河清頌 有序

臣聞善談天者必徵像於人工言古者先考績
於今鴻義以降遐哉邈乎鏤山嶽雕篆素昭德
垂勲可謂多矣而史編唐堯之功載格于上下
樂登文王之操稱於昭于天素振玄玉聿彰符
命朴牛文螭爰定祥曆魚鳥動色禾雉興讓皆
物不盈皆而美溢金石詩人於是不作頌聲爲
之而寢庸非惑歟自我皇宋之承天命也仰符

應龍之精俯協河龜之靈君圖帝寶粲爛瑰英
固以業光曩代事華前德矣聖上天飛踐極迄
茲二十有四載道化周流玄澤汪濊地平天成
含生阜熙文同軌通表裏釐福曜德中區黎庶
知讓觀英遐外夷貊懷惠恤勤秩禮散露臺之
金舒國賑民傾鉅橋之粟約蓮迫脅奢夫泰甚
讎無留飲畋不盤樂物色異人優游鯁直顯靡
失心幽無怨魄精炤日月事洞天情故不勞仗
斧之臣號令不嚴而自肅無辱鳳舉之使靈恠

不召而自彰萬里神行飈塵不起農商野廬邊
城偃折冀馬南金填委內府馴象西爵充羅外
圉阿紉纂組之饒衣覆宗國魚鹽杞梓之利傍
瞻荒遐士民殷富繁軼五陵宮宇宏麗崇冠三
川閭閻有盈歌吹無絕朱輪疊轍華冕重肩豈
徒世無窮人民獲休息朝呼韓罷酤鐵而已哉
是以嘉祥累仍福應充盛青丘之狝丹穴之鳥
栖阿閣遊禁園金芝九莖木禾六秀銅池發膏
啟腴宜以謁薦郊廟和協律呂烟霏霧集不可

勝紀然而聖上猶昧旦夙興若有望而未至宏
規遠圖如有追而莫及神明之貺推而弗居也
是以琬碑鏐檢盛典蕪而不治朝神省方大化
抑而未許崇文協律之士蘊儼頌於外坐朝陪
宴之臣懷揄揚於內三靈佇睠九壤注心既有
日矣歲宮乾維月遘蒼陸長河巨濟異源同清
澄波萬壑潔瀾千里斯誠曠世偉觀昭啓皇明
者也語曰影從表瑞從德此其效焉宣尼稱鳳
鳥不至河不出圖傳曰俟河之清人壽幾何皆

傷不可見者也然則古人所未見者今殫見之
矣孟軻曰千載一聖是旦暮也豈不信哉夫四
皇六帝樹聲長世大寶也澤浸羣生國富刑清
鴻德也制禮裁樂惇風遷俗文教也殊華通錫
東顧絳闕武功也鳴禽躍魚滌穢河渠至祥也
大寶鴻德文教武功其崇如此幽明協贊民祇
與能厥應如彼唯天爲大堯實則之皇哉唐哉
疇與爲讓抑又聞之勢之所覃者淺則美之所
傳者近道之所感者深則慶之所流者遠是以

豐功韙命潤色滕策盛德形容藻被歌頌察之
上代則奚斯吉甫之徒鳴玉鑾於前視之中古
則相如王褒之屬馳金羈於後絕景揚光清埃
繼路故班固稱漢成之世奏御者千有餘篇文
章之盛與三代同風由是言之斯廼臣子舊職
國家通議不可輟也臣雖不敏敢不勉乎乃作
頌曰

窺刊崩石楷逸殘竹巢風寂寥羲埃綿邈鉅生
大年瞻學淵聞繫繡成景粉績韻軒徒翫井科

永觀天河亘古通今明鮮晦多千齡一見書史
登歌旋我皇駕揆景方塗凌周顓殷蹶唐轢虞
如彼七緯累璧重珠高祖撥亂首物定靈更開
天地再鑄羣生帝御三條龍步八埏朔南暨教
海北騰聲淪深格高浹遐洞冥龜鼎遷宋玄圭
告成大明方微鴻光中微聖命誰堪皇曆攸歸
謀從筮協神與民推黃旗西映紫蓋東輝納瑞
螭玉升政衡機金輪約飾珠冕龍衣正位北辰
再拱南面天下何思日用罔倦復禮歸仁觀恒

通變一物有違戚言毀膳非躬簡法厚下安宅
謙德彌光損道滋益孝崇饗祀勤隆耕籍饘耐
秋羊封瑾春骼嬰耄兼梁鰥孤重帛體由學染
俗以教遷禮導刑清樂鬯風宣分衢讓齒折訟
推田野旌伏彥朝賞登賢儒訓優柔武節焱鷲
文憲精弘戎容犀利樞鈐明審程覆周備吏礪
平端民羞幸覩桴鼓凝埃烽驛垂轡銷我長劍
歸爲農器閩外水鄉鄣表炎國隴首西南渤海
東北艸艸嶺丹渾渾泉黑移踪雲勉轉集印焚

猥歌薦功烏譚陳德治轉化光民阜財盛班白
行謠清綺高詠雲表幽和物章明慶麗旌雕質
蠢行藻性仁草晨莘德宿宵映海無隱颺山有
黃落牛羊內首閤戶外拓瑞木朋生祥禽輦作
薰風蕩闥飴露流閣器範神妙劑調象藥匪直
也斯偉慶方溱注彼四瀆媚此雙川伏靈遙紀
闕既遐年澄波海嶽鏡流葱山泉室凝澱水府
清涓俛瞰夷都降眡驪淵朱宮潛耀紫閣陰鮮
昔在爽德王風不昌廼溢廼竭或壅或亡潔源

濫壑曾是未央先民永慨大道悠長云何其瑞
實鍾我皇聞諸師說天竦聽密介焉如響匪遠
惟疾矧是皇心妙夫貞一左右天經戶牖人術
訃暮布簡絲言盈室穢有緇祀清豈崇日一人
之慶吹萬稟和靈根方固修源重波副睿貳哲
帝體皇柯景雲蔚嶽秀星駢羅垂光九野騰響
四遐輔車鼎足槃石虎牙世匹周室基永漢家
泰階旣平洪河旣清大人在上區宇文明樵夫
議道漁父濯纓臣照作頌鋪德樹聲

佛影頌

形生麗怪神照潭寂驗幽以明考心者迹六塵
煩苦五道綿劇乃炳舟梁爰悟淪溺色丹貌續
留相瓊石金光絕見玉毫遺覲俾昏作朗効順
去逆

銘

凌煙樓銘

有序

臣聞憑飈薦響唱微効長垂波鑒景功少致深
是以冰臺築乎魏邑鳳閣起於漢京皆所以贊
生通志感悅幽情者也伏見所製凌煙樓棲置
崇迥延瞰平寂即秀神皋因基地勢東臨吳甸
西眺楚關奔江永寫鱗嶺相筭重樹窮天通原
盡日悲積陳古賞絕舊年誠可以暉曠高明藻
澈遠心矣夫識緣感傾事待言章匪言匪述綿

世罔傳敢作銘曰

巖巖崇樓藐藐層隅階基天削戶牖雲區瞰江
列楹望景延除積清風路合綵煙塗俯窺淮海
俛眺荆吳我王結駕藻思神居宜此萬春脩靈
所扶

石帆銘

應風剖流息石橫波下深地軸上獵星羅吐湘
引漢歛蠡吞沱西歷岷冢北瀉淮河眇森弘藹
積廣連深淪天測際亘海窮陰雲旌未起風柯
不吟崩濤山墜鬱浪雷沉在昔鴻荒刊啓源陸
表裏民邦經緯鳥服瞻貞視晦坎水巽木乃剡
乃鏟旣剡旣斲飛深浮遠巢潭館谷涉川之利
謂易則難臨淵之戒曰危乃安泊潛輕濟冥表
勤言穆戎遂留昭御不還徒悲猿鶴空駕滄煙

卷之八
君子彼想祇心載惕林簡松栝水採龍鵠颯氣
涉湖投祭沈璧揆檢含圖命辰定歷二嶠虎口
周王夙趨九祈羊腸漢臣電驅潛鱗浮異爭景
乘虛衡石頽籬帝子祭殂青山斷河后父沉軀
川吏掌津敢告訪途

飛白書勢銘

秋毫精勁霜素凝鮮霑此瑤波染彼松煙超工
八法蓋奇六文爲企龍躍珠解泉分輕如游霧
重似崩雲絕鋒劍摧驚勢箭飛差池驚起振迅
鴻歸寧危制節中險騰機圭角星芒明麗爛逸
絲縈夢垂平理端密盈尺錦兩片字金溢故仙
芝煩弱旣匪足雙蟲虎瑣碎又安能匹君子品
之是昆神筆

藥奩銘

歲賁走九生獸墮墻時無暇得年有遐方水玉
出煙靈飛生光龜文電衣龍綵雲裳九芝八石
延正盪斜二脂六體振衰返華毛姬餌葉鳳子
藏花景絕翠虬氣隱頰霞深神罕別妙奇不揚
或繁虎杖或亂蛇牀故不世不可以服未達不
可以嘗眩瞶通目是乃爲良

文

底步山楬文

歲舍龍紀月巡鳥張鮑子辭吳客楚指充歸揚
道出關津升高問途北眺羶鄉南曬炎國分風
代川揆氣閭澤肆睨天宮窮曜星絡東窺海門
候景落日遊精八表駛視四遐超然永念意類
交橫信哉古人有數寸之簫持千鈞之關非有
其才施處勢要也底步山者亦江中眇小山也
徒以因迥爲高據絕作雄而凌清瞰遠擅奇含

秀是亦居勢使之然也故才之多少不如勢之
多少遠矣仰望穹垂俯視地域涕洟江河瘧贅
缸嶽雖奮風漂石驚電剖山地綸維陷川闔毀
宮毫盈髮虛曾未注言况乎沉河浮海之高遺
金堆壁之奇四遷八聘之策三黜五逐之疵販
交買名之薄吮癰舐痔之卑安足議其是非

附錄

鮑照傳畧

沈約

鮑照字明遠文辭瞻逸嘗爲古樂府文甚遒麗
元嘉中河濟俱清當時以爲美瑞照爲河清頌
其序甚工世祖以照爲中書舍人上好爲文章
自謂物莫能及照悟其旨爲文多鄙言累句當
時咸謂照才盡實不然也臨海王子項爲荊州
照爲前軍參軍掌書記之任子項敗爲亂兵所

殺

鮑照傳畧

李延壽

鮑照字明遠東海人文辭膽逸嘗爲古樂府文
甚逾麗元嘉中河濟俱清當時以爲美瑞照爲
河清頌其敘甚工照始嘗謁義慶未見知欲貢
詩言志人止之曰卽位尙卑不可輕忤大王照
勃然曰千載上有英才異士沉沒而不聞者安
可數哉大丈夫豈可遂蘊智能使蘭艾不辨終
日碌碌與燕雀相隨乎於是奏詩義慶奇之賜
帛二十匹尋擢爲國侍郎甚見知賞遷秣陵令

文帝以爲中書舍人上好文章自謂人莫能及
照悟其旨爲文章多鄙言累句咸謂照才盡實
不然也臨海王子頊爲荊州照爲前軍參軍掌
書記之任子頊敗爲亂兵所殺

遺事

鮑昭荅孝武云臣妹才自亞於左芬臣才不及

太冲

詩品

顏延之問鮑照已與靈運優劣照曰謝如初出芙蓉自然可愛君如錦繡亦雕績滿眼

集評

次則發唱驚挺操調險急雕藻淫豔傾炫心魂
亦猶五色之有紅紫八音之有鄭衛斯鮑照之
遺烈也

南齊書文
學傳論

宋參軍鮑照詩其源出於二張善製形狀寫物
之詞得景陽之諛詭含茂先之靡嫚骨節強於
謝混驅邁疾於顏延總四家而擅美跨兩代而
孤出嗟其才秀人微故取湮當代然貴尚巧似
不避危仄頗傷清雅之調故言險俗者多以附

鮑照詩品

鮑照之作如珊瑚琅玕木難火齊鼎資鏤琢而

自足偉觀

竹林詩評

愁思忽而至跨馬出北門舉頭四顧望但見松柏荆棘鬱蹲蹲中有一鳥名杜鵑言是古時蜀帝魂聲聲哀苦鳴不息羽毛憔悴似人髣飛走樹間逐蟲蟻豈憶往日天子尊念此死生變化非常理中心惻愴不能言此鮑明遠詩也與子美杜鵑行語意極相類大抵古今興比所在適

有感發者不必盡相迴避要各有所主耳此

詩者不以辭害義之意也

蔡寬夫詩話

明遠行路難壯麗豪放若決江河詩中不可比

擬大似賈誼過秦論

詩彥周詩話

鮑明遠才健其詩乃選之變體李太白專學之

如腰鎌刈葵藿倚杖牧雞豚分明說出箇倔強

不肯甘心之意如疾風衝塞起沙礫自飄揚馬

毛縮如蝟角弓不可張分明說出邊塞之狀語

又俊健

朱文公

宋人康樂外明遠信爲絕出上挽曹劉之逸步
下開李杜之先鞭

詩藝

梅花遠體遠神妙在情而不在事知此可讀鮑

參軍梅詩

詩編